

Pwyllgor	PWYLLGOR CRAFFU CYMUNEDAU
Dyddiad	16 Mai 2024
Teitl	Cyflwyno Adroddiad Ymgysylltu Cyhoeddus: Cyfnod Ymgysylltu Rhybudd Cyfarwyddyd Erthygl 4
Aelod Cabinet	Cynghorydd Dafydd Meurig
Awdur	Gareth Jones – Pennaeth Cynorthwyol Adran Amgylchedd
Pwrpas	I graffu'r sylwadau a dderbyniwyd yn ystod y cyfnod ymgysylltu cyhoeddus ac ymateb y Cyngor i'r sylwadau.

1. CEFNDIR

- 1.1 Cyflwynwyd adroddiad i Bwyllgor Craffu Cymunedau ar 9 Mawrth 2023 a oedd yn rhoi trosolwg o'r gwaith yn gysylltiedig â chyfiawnhau'r bwriad o fod yn cyflwyno Cyfarwyddyd Erthygl 4. Amlygwyd y broses a oedd yn gysylltiedig â'r bwriad ynghyd a'r trywydd gweithredu a oedd yn cael ei ffafrio, hynny yw cynnwys y Cyfarwyddyd Erthygl 4 a'r ardal ddaearyddol a fyddai'n berthnasol iddo.
- 1.2 Pwrpas y Cyfarwyddyd Erthygl 4 (os cadarnheir) yw diddymu hawliau datblygu a ganiateir (*permitted development*) yn gysylltiedig â newid defnydd tŷ preswyl (defnydd C3) i ddefnydd gwyliau, boed hynny yn ddefnydd fel ail gartref (dosbarth defnydd C5), llety gwyliau tymor byr (defnydd C6) neu yn ddefnydd cymysg o'r dosbarthiadau hyn.
- 1.3 Cynhaliwyd cyfnod ymgysylltu cyhoeddus yn gysylltiedig â Rhybudd Cyfarwyddyd Erthygl 4 rhwng 2 Awst ac 13 Medi 2023. Roedd cynnal y cyfnod ymgysylltu hwn yn ofyn statudol sydd wedi ei osod yn y Gorchymyn Cynllunio Gwlad a Thref (Datblygu Cyffredinol a Ganiateir) 2022 (fel y diwygiwyd)¹.
- 1.4 Mae gofyn nawr ar y Cyngor i ystyried y sylwadau a dderbyniwyd yn ystod y cyfnod ymgysylltu cyn gwneud eu penderfyniad terfynol o ran cadarnhau'r Cyfarwyddyd Erthygl 4. Bydd y penderfyniad yma yn gyfrifoldeb ar Gabinet Cyngor Gwynedd. Os penderfynir ei gadarnhau bydd y Cyfarwyddyd Erthygl 4 yn weithredol o 1 Medi 2024 ymlaen.

2. PWRPAS

- 2.1 Yn dilyn yr adroddiad a gyflwynwyd i Bwyllgor Craffu Cymunedau ar 9 Mawrth 2023, cyflwynir y papur hwn er mwyn caniatáu i'r Pwyllgor Craffu rhoi ystyriaeth i'r sylwadau a dderbyniwyd yn ystod y cyfnod ymgysylltu cyhoeddus ac ymateb y Cyngor i'r sylwadau hynny.

¹ [Gorchymyn Cynllunio Gwlad a Thref \(Datblygu Cyffredinol a Ganiateir\) 2022 \(fel y diwygiwyd\)](#)

2.2 Ymhellach fe gyflwynir trosolwg o'r camau sydd ynghlwm a'r broses o gyflwyno'r Cyfarwyddyd Erthygl 4 a'r amserlen gysylltiedig.

3. BWRIAD

3.1 Mae'r broses yn gysylltiedig â gosod Rhybudd Cyfarwyddyd Erthygl 4 wedi ei nodi yn y Gorchymyn Cynllunio Gwlad a Thref (Datblygu Cyffredinol a Ganiateir) 2022 (fel y diwygiwyd). Mae yna bedwar prif gam sydd ynghlwm a'r broses:-

- **Cam 1: Penderfynu gosod y Rhybudd Cyfarwyddyd Erthygl 4;**
- **Cam 2: Cynnal y cyfnod ymgysylltu cyhoeddus;**
- **Cam 3: Ystyried y sylwadau a dderbyniwyd a gwneud y penderfyniad terfynol (cadarnhau'r Cyfarwyddyd Erthygl 4);**
- **Cam 4: Gweithredu'r Cyfarwyddyd Erthygl 4**

Cam 1: Penderfynu gosod y Rhybudd Cyfarwyddyd Erthygl 4.

3.2 Paratowyd Papur Cyfiawnhad, er mwyn cefnogi'r trywydd gweithredu yn gysylltiedig â chyflwyno'r Cyfarwyddyd Erthygl 4 gan y Gwasanaeth Polisi Cynllunio. Cyflwynwyd y Papur Cyfiawnhad ynghyd a fersiwn drafft o'r Rhybudd Cyfarwyddyd Erthygl 4 a'r fersiwn drafft o'r Cyfarwyddyd Erthygl 4 i gyfarfod o Gabinet Cyngor Gwynedd ar 13 Mehefin 2023.

3.3 Yn ystod y cyfarfod yma, fe benderfynodd y Cabinet:-

- Gymeradwyo'r papur cyfiawnhau cyflwyno Cyfarwyddyd Erthygl 4.
- Cymeradwyo gwneud Cyfarwyddyd Erthygl 4 sydd ddim yn dod i rym yn uniongyrchol (hynny yw yn weithredol ar ôl cyfnod o 12 mis).
- Gosod Rhybudd o'r Cyfarwyddyd Erthygl 4.

Cam 2: Cynnal y cyfnod ymgysylltu cyhoeddus

3.4 Fe osodwyd y Rhybudd Cyfarwyddyd Erthygl 4 ar yr 2ail Awst, 2023 am gyfnod o 6 wythnos (hyd at 13 Medi, 2023). Mae'r gofynion a osodir yn y Gorchymyn Cynllunio Gwlad a Thref (Datblygu Cyffredinol a Ganiateir) 2022 (fel y diwygiwyd) yn ei wneud yn ofynnol i osod Rhybudd Cyfarwyddyd Erthygl 4 am gyfnod o 21 diwrnod. Er sicrhau rhoi digon o gyfle i'r sawl a effeithir fod yn ymateb i'r Rhybudd fe benderfynwyd ei osod am gyfnod o chwe wythnos.

3.5 Roedd yn ofynnol gosod y Rhybudd mewn o leiaf dau fan cyhoeddus o fewn yr ardal mae'n berthnasol iddo. Gan fod ardal gweithredu'r Cyfarwyddyd Erthygl 4 yn cynnwys Ardal Awdurdod Cynllunio Lleol Gwynedd gyfan, penderfynwyd ei fod yn rhesymol gosod copi o'r Rhybudd mewn man cyhoeddus ym mhob anheddle a effeithir. Golygai hynny fod yna 114 o rybuddion safle wedi cael ei osod. Sicrhawyd fod yna gofnod o osod y rhybudd (llun) ac fe farciwyd lleoliad y rhybudd ar fap.

3.6 Rhoddwyd cyhoeddusrwydd pellach i'r ffaith fod y Rhybudd wedi ei osod gan lythyru pob tŷ preswyl o fewn Ardal Awdurdod Cynllunio Lleol Gwynedd (oddeutu 52,000 o dai preswyl mewn nifer). Gwerth pwysleisio nad oedd yn ofynnol llythyru pob tŷ preswyl, gan fod y gorchymyn yn nodi nad yw'n angenrheidiol i wneud hynny os ystyrir ei fod yn

anymarferol. Fodd bynnag, ystyriwyd ei fod yn bwysig fod yna ymwybyddiaeth o'r bwriad gan berchnogion tai preswyl oherwydd yr effaith a allai ei gael arnynt a chan hynny penderfynwyd y byddai'n rhesymol i fod yn llythyru pob tŷ preswyl.

- 3.7 Ymhellach, yn unol â'r gofynion, fe osodwyd y Rhybudd yn y papurau newydd lleol (Caernarfon and Denbigh Herald, Cambrian News a Bangor Mail). Roedd copïau o'r dogfennau perthnasol ar gael i'w archwilio ym mhrif swyddfeydd y Cyngor a'r llyfrgelloedd cyhoeddus lleol ynghyd ac ar wefan y Cyngor.
- 3.8 Ynghyd a gosod y Rhybudd fe ymgwymerwyd â chyfnod ymgysylltu cyhoeddus yn ystod yr un cyfnod. Roedd posib cyflwyno sylwadau ar bapur neu ar lein.
- 3.9 Er mwyn hwyluso'r broses o gyflwyno sylwadau fe baratowyd tudalen we bwrpasol (www.gwynedd.llyw.cymru/erthygl4) a oedd yn cynnwys y wybodaeth hanfodol ynghyd a chynnwys cyfres o gwestiynau ac atebion cyffredin yn y gobaith o geisio lleddfu'r baich o ran y niferoedd o ymholiadau a dderbyniwyd. Nodir fod defnydd cyson hefyd wedi cael ei wneud o'r cyfryngau cymdeithasol er codi ymwybyddiaeth.
- 3.10 Roedd yr holiadur a baratowyd yn cynnwys dau gwestiwn pen agored a oedd yn rhoi cyfle i bobl fynegi barn ar y Cyfarwyddyd Erthygl 4 ac i nodi'r effaith a fyddai'n debygol o'i gael ar bobl sydd â nodweddion gwarchoddedig, y Gymraeg a'r economaidd-anfantais. Credir fod y gwaith ymgysylltu sydd wedi ei gynnal yn mynd tu hwnt i'r gofyn statudol, ond gan fod y Cyfarwyddyd Erthygl 4 yn cynnwys ardal yr Awdurdod Cynllunio Lleol gyfan ac yn effeithio ar holl drigolion yr ardal, roedd yn bwysig ein bod yn gwneud beth oedd yn rhesymol ac yn ymarferol i ni wneud fel awdurdod.

Cam 3: Ystyried y sylwadau a dderbyniwyd a gwneud y penderfyniad terfynol

- 3.11 Yn ystod y cyfnod ymgysylltu cyhoeddus fe dderbyniwyd cyfanswm o 3,902 o ymatebion dilys. Cyflwynwyd 3,508 o sylwadau drwy'r holiadur ar lein gyda 394 o sylwadau yn cael ei gyflwyno ar ffurf llythyr neu e-bost. Yn ychwanegol i'r ymatebion dilys hyn (hynny yw, dilys o ran bod yna sylw wedi ei gyflwyno) fe gyflwynwyd 369 o ymatebion gwag. Er nad oedd yr ymatebion gwag hyn yn cynnwys ymateb i'r cwestiwn canfod barn, mae rhai o'r ymatebion wedi ymateb i'r adran 'Amdanaf i' (manyllion personol).
- 3.12 Mae yna Adroddiad Ymgysylltu wedi ei baratoi er mwyn adrodd ar y sylwadau a dderbyniwyd yn ystod y cyfnod ymgysylltu (Atodiad 1) Oherwydd natur y sylwadau a'r ystod eang o faterion sydd wedi ei godi, mae'r ymatebion a dderbyniwyd wedi ei gategoreiddio yn unol â thema benodol. Ar gyfer pob thema fe gofnodir y niferoedd o sylwadau a dderbyniwyd a oedd yn berthnasol i'r thêrn hynny, crynodeb o'r sylw a 'Ymateb y Cyngor' i'r mater dan sylw. O dan bob prif thema mae yna is-thêrn wedi cael ei gofnodi. Roedd y sylwadau a dderbyniwyd yn cael ei gofnodi yn unol â'r is-thema hyn. Gall rhai achoson fod ble fo'r ymatebydd wedi codi sylw mewn perthynas â un neu fwy o'r is-thema. Mae cyfanswm 'Nifer Sylwadau' sydd wedi ei gofnodi yn seiliedig ar y nifer cyfunol o ymatebion sydd yn deillio o'r is-thêrn'.

Ymateb y Cyngor i'r sylwadau

- 3.13 Wrth archwilio'r Adroddiad Ymgysylltu (Atodiad 1) mae yna ymateb i'r sylwadau a dderbyniwyd yn cael ei nodi. Mae natur yr ymateb i'r sylwadau yn amrywio gyda mwy o

ystyriaeth a sylw gan amlaf yn cael ei roi i sylwadau lle bo angen cyfeirio at dystiolaeth benodol neu ychwanegol i gyfarch ymateb y Cyngor.

- 3.14 Mae pob cam o'r broses o baratoi'r Cyfarwyddyd Erthygl 4 wedi bod yn destun asesiad cyfreithiol arbenigol ac mae addasiadau wedi ei gynnal sydd yn adlewyrchu'r arweiniad a dderbyniwyd.
- 3.15 Sylwer yn ogystal fod rhai o'r ymatebion wedi arwain at gynnal gwaith ymchwil ychwanegol gan gynnwys cysylltu hefo darparwyr morgeisi lleol ynghyd a Chynghorau lleol.
- 3.16 Prif amcan cyflwyno'r Cyfarwyddyd Erthygl 4 fyddai ceisio gwyrddroi'r anghyfartaledd cymdeithasol sydd yn bodoli yn rhai o gymunedau Gwynedd, gan geisio sicrhau fod yna ddarpariaeth o dai (gan gynnwys tai fforddiadwy) ar gael i ddiwallu angen lleol.
- 3.17 Mae yna ystod o ymatebion wedi ei dderbyn sydd yn cynnwys sylwadau sydd yn gyffredinol gefnogol o'r bwriad ac yn ystyried y byddai'n cynnig cyfleoedd i bobl fyw yn eu cymunedau. Ar y llaw arall, mae nifer yn pryderu y bydd y bwriad yn effeithio'n andwyol oherwydd y pryder y byddai arwain at ostwng gwerth eiddo gan olygu fod unigolion/teuluoedd yn mynd i ddiweddu fyny mewn ecwiti negyddol ar eu heiddo ac yn cael anhawster hefo cael morgeisi.
- 3.18 Mae'r 'Adroddiad Ymgysylltu Cyhoeddus: Cyfnod Ymgysylltu Rhybudd Cyfarwyddyd Erthygl 4' (Atodiad 1) yn ymateb i'r pryderon hyn. O ran gostwng gwerth eiddo mae yna waith ymchwil wedi ei gynnal yn edrych ar sut fo mecanweithiau tebyg wedi effeithio ar werth eiddo mewn ardaloedd eraill, gan ddod i gasgliad nad oes yna unrhyw batrwm amlwg i'w weld. Mae gwaith ymchwil pellach hefyd wedi ei gynnal o ran argaeledd morgeisi ynghyd a'r effaith y gallasai'r bwriad ei gael ar y sector twristiaeth.
- 3.19 Cyflwynwyd y Cyfarwyddyd Erthygl 4 yn wreiddiol yn dilyn paratoi'r Papur Cyfiawnhad a gyflwynwyd i Gabinet y Cyngor ym Mehefin 2023. Yn dilyn y cyfnod ymgysylltu cyhoeddus a'r broses o gloriannu'r ymatebion a dderbyniwyd ac ymateb iddynt (gweler Atodiad 1) nid ydym wedi canfod unrhyw wybodaeth ychwanegol a fyddai'n cyfiawnhau peidio â chadarnhau'r Cyfarwyddyd Erthygl 4.

Cam 4: Gweithredu'r Cyfarwyddyd Erthygl 4

- 3.20 Yn ddarostyngedig i benderfyniad y Cabinet fe fydd y Cyfarwyddyd Erthygl 4 yn weithredol o 1 Medi, 2024 ymlaen. Oherwydd y llwyth gwaith ychwanegol a ragwelir yn dilyn y penderfyniad, fe fwriedir recriwtio dau Swyddog Cynllunio / Hyfforddai Cynllunio ychwanegol i'r Gwasanaeth Cynllunio yn ystod yr wythnosau nesaf (sydd yn ychwanegol i'r 2 swyddog sydd wedi eu recriwtio eisoes). Mae'r llwyth gwaith ychwanegol a ragwelir yn cynnwys:-

- Ceisiadau Tystysgrif Defnydd Cyfreithiol a dderbynnir, gyda pherchnogion eiddo eisiau derbyn cadarnhau ffurfiol o'r defnydd;
- Ceisiadau newid defnydd yn cael ei gyflwyno ar gyfer defnyddiau a arferai fod yn hawl datblygu;

- Cynnydd yn y nifer o gwynion a fydd yn cael ei dderbyn o ran cam ddefnydd o dai preswyl;
 - Mwy o ymholiadau cyffredinol er mwyn cael dealltwriaeth o'r sefyllfa.
- 3.21 Bydd bosib ariannu'r swyddi ychwanegol a fwriedir ei lenwi gan ddefnyddio'r arian sydd wedi ei bennu gan y Llywodraeth yn gysylltiedig â chefnogi ystod o weithgareddau ynghlwm a Chynllun Peilot Dwyfor, ynghyd ac arian sydd wedi cael ei glustnodi gan y Cyngor.
- 3.22 Elfen arall bwysig er sicrhau fod yr amcan ehangach o weithredu'r Cyfarwyddyd Erthygl 4 yn cael ei gyflawni bydd sicrhau fod y polisiâu cynllunio lleol yn addas eu pwrpas. Gan hynny bwriedir gwneud diwygiadau i'r Canllaw Cynllunio Atodol: Cyfleusterau a Llety i Dwristiaid er mwyn rhoddi arweiniad pellach o ran sut i gymhwyso polisiâu'r Cynllun Datblygu Lleol ar y Cyd yn sgil y Cyfarwyddyd Erthygl 4. Ymhellach fe fydd angen ystyried cynnwys y polisiâu perthnasol a gynhwysir yn y darpar Gynllun Datblygu Lleol newydd.

4. YSTYRIED EFFAITH

- 4.1 Mae'n ofynnol i'r Cyngor (dan Ddeddf Cydraddoldeb 2010) i ystyried yr effaith fydd newid mewn unrhyw bolisi neu weithdrefn (neu greu polisi neu weithdrefn o'r newydd), yn ei gael ar bobl hefo nodweddion cydraddoldeb gwarchoddedig. Mae gan y Cyngor hefyd ddyletswyddau cyffredinol ychwanegol i sicrhau tegwch a meithrin perthnasau da. Rhaid felly ymgymryd ag Asesiad Effaith Cydraddoldeb cyn gwneud penderfyniad ar unrhyw newid perthnasol (h.y. sy'n cael effaith ar bobl hefo nodwedd warchoddedig).
- 4.2 Mae hefyd yn ofynnol i'r Cyngor, dan ofynion Safonau'r Gymraeg (Adran 44 Mesur y Gymraeg (Cymru) 2011) ystyried yr effaith fydd newid mewn unrhyw bolisi neu weithdrefn (neu greu polisi neu weithdrefn o'r newydd), yn ei gael ar gyfleoedd i bobl ddefnyddio'r Gymraeg ac i sicrhau nad yw'r Gymraeg yn cael ei thrin yn llai ffafriol na'r Saesneg.
- 4.3 Ymhellach, yn unol â'r Ddyletswydd Economaidd-Gymdeithasol a ddaeth i rym yng Nghymru ar 31 Mawrth 2021 mae'n ddyletswydd ar gyrrff cyhoeddus i ystyried sut gall penderfyniadau strategol, gan gynnwys gosod amcanion a datblygu gwasanaethau cyhoeddus, leihau anghydraddoldebau o safbwynt y canlyniad i bobl sy'n wynebu anfantais economaidd-gymdeithasol.
- 4.4 Er mwyn asesu sut fyddai'r bwriad o gyflwyno Cyfarwyddyd Erthygl 4 yn effeithio ar y gofynion a nodir uchod mae yna Asesiad Effaith Cydraddoldeb integredig (Asesu Effaith ar Nodweddion Cydraddoldeb, y Gymraeg ac Anfantais Economaidd-Gymdeithasol) wedi cael ei baratoi. Mae'r Asesiad wedi ei gynnwys yn Atodiad 4 o'r 'Adroddiad Ymgysylltu Cyhoeddus: Cyfnod Ymgysylltu Rhybudd Cyfarwyddyd Erthygl 4' (sydd i'w weld yn Atodiad 1). Mae'r Asesiad hyn wedi cael ei ddiwygio yn dilyn y cyfnod ymgysylltu cyhoeddus.
- 4.5 Amlygir yr Asesiad ei fod yn anodd rhagweld beth fyddai effaith gweithredu ar y Cyfarwyddyd Erthygl 4 gan fod gweithredu yn y modd hwn yn ddigynsail. Nodir fodd bynnag fod yr anghyfartaledd cymdeithasol sydd yn bodoli ar hyn o bryd mewn rhai cymunedau yn sgil y diffyg argaeledd o dai fforddiadwy ynghyd a phrisiau tai sydd tu hwnt

i gyrraedd yn creu cymdeithas ranedig anghynladwy. Mewn ymgais i geisio gwyrddroi'r sefyllfa bresennol gobeithir y bydd cyflwyno'r Cyfarwyddyd Erthygl 4, yn rhoi'r cyfle i asesu priodoldeb unrhyw fwrriad sydd yn ymwneud a newid defnydd tŷ preswyl i ddefnydd gwyliau, boed hynny yn ddefnydd llety gwyliau neu ail-gartref. Gobeithir y bydd hyn yn creu cymdeithas decach ac yn sicrhau cyfleoedd i bawb fod yn gallu byw yn eu hardal o ddewis. Nodir gan hynny fod lleihau anghydraddoldeb sydd yn deillio o anfantais economaidd-gymdeithasol yn rhan greiddiol o'r rheswm pam fo angen cyflwyno'r Cyfarwyddyd Erthygl 4. Ymhellach daethpwyd i'r casgliad y byddai'r drefn newydd yn fwy cynhwysol ac yn cynnig cyfle i bawb gael mewnbwn i'r broses Gynllunio.

- 4.6 Mae'r asesiad hefyd yn dod i gasgliad y byddai cyflwyno'r Cyfarwyddyd Erthygl 4 yn cael effaith positif ar yr iaith Gymraeg a chydbwysedd cymunedau gan y gobeithir y bydd yn sefydlogi'r farchnad dai ac yn cynnig cyfleoedd i bobl fedru byw yn eu cymunedau.
- 4.7 Amlygir yr Asesiad y bydd sicrhau fframwaith fonitro priodol er mwyn asesu effaith gweithredu ar y Cyfarwyddyd Erthygl 4 yn gwbl hanfodol, ac yn fodd o adnabod effeithiau negyddol (a phositif) a cheisio ymateb iddynt yn ôl yr angen.

Deddf Llesiant Cenedlaethau'r Dyfodol (Cymru) 2015

- 4.8 Ystyriaeth arall bwysig yw'r Ddeddf Llesiant Cenedlaethau'r Dyfodol (Cymru) 2015. Mae'r Ddeddf yn ceisio gwella llesiant cymdeithasol, economaidd, amgylcheddol a diwylliannol Cymru. Mae'r ddeddf yn gosod dyletswydd llesiant ar gyrrff cyhoeddus ac wedi ei anelu at gyflawni 7 o nodau llesiant drwy ddilyn y 5 ffordd o weithio. Mae'r tabl canlynol yn amlygu'r nodau llesiant hyn ac yn egluro'n gryno sut mae'r bwriad yn cyflawni'r nodau dan sylw:-

Nod	Eglurhad o sut mae'r bwriad o gyflwyno'r Cyfarwyddyd Erthygl 4 yn cyflawni'r nod
Cymru lewyrchus	Bydd yn cynnig cyfleoedd i bobl fyw a gweithio yng Ngwynedd a chan hynny yn golygu fod yna poblogaeth sefydlog, fedrus ac addysgedig i gefnogi'r economi leol.
Cymru gydnerth	Bydd yn arwain at gymdeithas decach a thrwy hynny bydd cydnerthedd cymdeithasol y sir yn cael ei gynnal.
Cymru iachach	Bydd yn creu cymdeithas decach a thrwy hynny yn creu amgylchiadau i bobl allu fyw a gweithio yng Ngwynedd, sydd yn ei dro yn cael effaith positif ar iechyd.
Cymru sy'n fwy cyfartal	Bydd yn creu cymdeithas sydd yn fwy cyfartal ac yn galluogi gwell cyfleoedd i bawb.
Cymru o gymunedau cydlynus	Bydd yn fodd o greu cymunedau atyniadol, hyfyw a diogel.
Cymru â diwylliant bywiog lle mae'r Gymraeg yn ffynnu	Bydd yn cynnig gwell cyfleoedd i bobl allu byw yn eu cymunedau a thrwy hynny yn fodd anuniongyrchol o warchod diwylliant, treftadaeth a'r Gymraeg.
Cymru sy'n gyfrifol ar lefel fyd-eang	Er y byddai gweithredu'r Cyfarwyddyd Erthygl 4 yn cael ei wneud ar lefel leol yng Ngwynedd, mae'r egwyddor o greu cymdeithas decach a chynnig gwell cyfleoedd i bobl fyw a gweithio yn eu cymunedau lleol a thrwy hynny creu

	cymunedau hyfyw a chynaliadwy yn esiampl o ymarfer da.
--	--

5.0 CAMAU NESAF

- 5.1 Bydd Adroddiad yn cael ei gyflwyno i gyfarfod o Gabinet Cyngor Gwynedd yn ystod mis Mehefin yn cyflwyno'r Adroddiad Ymgysylltu Cyhoeddus (Atodiad 1) ac yn gofyn i'r Cabinet wneud y penderfyniad terfynol ar y Cyfarwyddyd Erthygl 4.
- 5.2 Yn seiliedig ar asesiad o'r ymatebion i'r sylwadau sydd wedi ei gyflwyno yn dilyn y cyfnod ymgysylltu cyhoeddus, ystyriaeth o'r dystiolaeth sydd yn y papur cyfiawnhad Erthygl 4 a'r gwaith ymchwil pellach sydd wedi ei gynnal i ymateb i rai o'r sylwadau gyflwynwyd nid oes unrhyw wybodaeth ychwanegol wedi ei ganfod sydd yn cyfiawnhau peidio a chadarnhau'r Cyfarwyddyd Erthygl 4.
- 5.3 Yn ddarostyngedig i gymeradwyaeth y Cabinet bydd rhaid i'r Cyngor weithredu ar roi cyhoeddusrwydd i'r penderfyniad o gadarnhau'r Cyfarwyddyd Erthygl 4 yn unol â'r gofynion statudol.

6. ARGYMHELLION

- 5.1 Gofynnir i'r Pwyllgor Craffu dderbyn yr adroddiad a chyflwyno unrhyw sylwadau ar yr Adroddiad Ymgysylltu cyhoeddus (Atodiad 1) fel y briodol. Bydd sylwadau'r Pwyllgor Craffu yn cael eu hadrodd i'r Cabinet wrth wneud eu penderfyniad terfynol mewn perthynas â chadarnhau'r Cyfarwyddyd Erthygl 4.

ATODIADAU

Atodiad 1: Adroddiad Ymgysylltu Cyhoeddus: Cyfnod Ymgysylltu Rhybudd Cyfarwyddyd Erthygl 4